



Gigidziiminaanig Inaakonigewin 2025-2027

1. Ezhi-aanikooseg

Seven Generations Education Institute, Rainy River District School Board, ogowe gaye SayITFirst, wiidanokiindiwig ji-wiijitwaawaad Anishinaabemowin ji-azhe-ayaag imaa anishinaabeg endaawaad. Oga-ziitoshkaagowaa' imaa eyaanid onowe midaaso ishkoniganan. Gichi-aya'aag gaa-nitaa-anishinaabemowaad, gaa-gakendaasowaad da-naazikawaawag ji-ani-gikinoo'amaagewaad ge-izhisegiban iwe Anishinaabemodaa Initiative.

2. Gaa-izhichigeng

- a. Asemaan da-miinaa awe bezhig Gigidziiminaan ji-baakiniged. Wiin igo nakeya'ii waa-izhi-baakiniged, ezhi-aabajitood gaye miijim, bagijigewin, nookwezigan, waa-izhi-aanamitaagozid gaye da-izhichige. Da-wiijitwaa awe gaa-dagwiid imaa Anishinaabemodaa Team giishpin gegoo anoonind.
- b. Asemaan da-miinaa awiya imaa bi-wiidabanged.
- c. Minik igo ezhi-gashkitoong, gakina awiya daa-anishinaabemo maano go ji-waawiji'iding.
- d. Giishpin awiya bekaanizid gegoo wii-gagwejimaad i'iwe Gigidziiminaanig, da-bi-izhaa imaa zagaswe'iding; asemaan, bagijigewin gaye da-miigiwe bi-wiindamaaged wegonen iwe gaa-wii-gagwedwed. Apii miinawaa zagaswe'iding, da-wiindamowaa ge-izhi-wiji'indiban.

- e. Endaso zagaswe'iding, Anishinaabemodaa Team enokiiwaad oga-onaabimaawaa' ge-mawadishiwenid. Da-dagwiiwag igo ogowe enokiiwaad ji-onji-gakendamowaad gegoo.
- f. Wii-wiikonding gii-ziigong, gii-dagwaaging gaye, bezhig igo ono zagaswewigamigoon omaa ono midaaso okogewinan eyaagin dadanakamigizim. Saagijiwe awe gaye Gookomisinaan da-maajiinaawag i'apii.

3. Waa-ani-izhichigeng

Endaso-niizho-giizis da-zagswe'idiwag igiwe Gigidiziiminaanig. Niizhwaaching Aanikoo'bijigeng gikinoo'amaadiiwigamig eyaag imaa Fort Frances, Ontario da-danakamigiziwag. Gaa-Niigaanishkang Anishinaabemodaa Anokiiwin oga-ozhisitooon. Da-biminizha'igaate ezhising waa-ani-izhichigeng, bizaan win igo gegoo daa-aanikoobii'igaate giishpin inendamowaad igiwe Gigidiziiminaanig.

4. Gaa-inagizong owe gaye Ge-inanokiing

Oga-ziitoshkawaawaa' gigidiziminaanig iwe Anishinaabemodaa Initiative Team wii-azhe-mashkawidoowaad gidinwewininaan. Da-anishinaabemowag gii-zagaswe'idiwaad maano-go ji-wiiji'iweyaad. Da-ayaawag gaye:

- a. Da-gikinoo'amaagewag ge-izhi-anishinaabe inikaategin onowe ge-ani-aabadakin.
- b. Inaadiziwin, izhichigewinan, gidinwewininaan, anishinaabe-inaakonigewinan gaye da-aazhawenamaagewag.
- c. Da-gagaanzongewag ge-ani-izhichigewaapan gaa-anokiiwaad imaa Anishinaabemodaa Team.
- d. Da-dagwiiwag imaa zagaswe'iding.
- e. Oga-anindaanaawaa mazina'igan ge-miinigowaad iwe Anishinaabemodaa Team.
- f. Endaso-niizho-biboon oga-aanji-dibaabandaanaawaa iniwe izhichigewinan gaa-ozhibii'igaatenig.

Anishinaabemodaa gaa-anokaatamowaad owe da-izhichigewag:

- g. Oga-ozhisitonaawaa iniwe zagaswe'iwewinan, aandi gedanakamigak, ge-miijing owe gaye ge-ani-dazhinjigaateg i'apii.
- h. Giizhaa da-miinaawag Gigidziiminaanig owe ge-dazhindaang.
- i. Da-ozhibii'igaate gaa-gii-dazhinjigaateg; Gigidziiminaanig da-miinaawag ishkwaaseg iwe zagaswe'idiwin.
- j. Gaa-bi-mawadishiwewaad, da-wiindamawaawag ezhi-biminizha'igaateg iwe zagaswe'iwewin.
- k. Gaa-aanikanootamaagewaad da-waawiiitwaawag imaa zagaswe'iding.

5. Dibendaagoziwin

Endaso-ishkonigan, niizh da-onjiiwag ge-dagwiiwaad netaa-anishinaabemowaad. Nawaj da-onji-nisidotamoog gaa-anokiiwaad imaa bi-dagobiwaad. Giishpin gashkitoosig awe gaa-aginzod geyaabi imaa ji-namadabid, da-wiindamaage awenenan ge-naabishkaagopan. Minik-igo ge-ani-bimosemagak iwe Gigidziiminaanig-zagaswe'idiwin, gaa-nitaa-anishinaabemod/gichi-ayaa'aa ga'onaabamind ji-aginzod imaa da-ayaa.

6. Diba'amaadiwin ge-izhising

Endaso-bebezhigowaad ogowe gichi-aya'aag, niizhwaak ashi-naanamidana-daswaabik da-diba'amawaawag endaso-niizho-giizis bi-zagaswe'idiwaad. Diba'igan-diba'amaadiwin gaye da-miinaawag bi-ipizowaad. Ogowe Anishinaabemodaa Initiative Team; ningo-dibik oga diba'aanaawaa ingoji ji-nibe'indwaa gigidziiminaanig bi-zagaswe'idiwaad; ge-izhiwebak, owe gaye ezhi-andawendaang i'apii da-diba'igaate.

Gaa-wiiji'aad gichi-ayaa'aan da-ondinaa giishpin bakaan dazhi-zagaswe'idiwaad. Mii awe ge-wiiji'aad wii-babaami'ayaanid gichi-ayaa'aan. Oga-biminizha'aan Gaa-inagizong owe gaye Ge-inanokiing Mazina'igan wa'awe gaa-wiiji'aad ini gichi-ayaa'aan.

Anishinaabemodaa-team de-izhi-gagwedwewag gichi-ayaa'aag giishpin
awiya andawenimaawaad ge-babaa-wiiji'igowaad.
Oga-aazhidebii'aanaawaa gayewiinawaa ogo gichi-aya'aag o'owe
Mazina'igan.